

**REGIONAL NEWS BULLETIN
HEADLINES (EVENING)**

Date – 13/12/2024

Time - 18:30 -18:40Hrs

- Larsap Dr. Hari Babu Kambhampati-an vawiin khan Assam Rifles sipai zinga hnathawk tha zual thlanchhuah mi 35 te hnenah chawimawina tangkapui a hlan.
- Chief Minister Pu Lalduhoman hunpui lo thleng tur huphurh hluah hluah chhungkaw tam tak te thleng phaka sawrkar leh tlawmngai pawlte an kun hniam a tul a ti.
- Vawiin khan Prime Minister Narendra Modi-a'n cheng Vbch 6670 senga hmasawna hnathawh Prayagraj-ah a hawng.
- Lok Sabha-ah ni 2 awh tur India danpuiin kum 75 a tlin chungchang vawiinah sawiho tan a ni.



GOVERNOR

Larsap Dr. Hari Babu Kambhampati-an vawiin khan Assam Rifles sipai zinga hnathawk tha zual thlanchhuah mi 35 te hnenah chawimawina tangkapui a hlan.

Tangkapui hlanna, Investiture Ceremony hi Inspector General Assam Rifles (East) buatsaihin Circular Lawn, Raj Bhavan-ah neih a ni a, Governor's Gold Medal 15 leh Silver Medal 20 hlan a ni a. Larsap chuan Assam Rifles-te chu India rama paramilitary force upa ber leh India hmarchhaka hmingtha tak, an hnathawh that avanga 'Tlang mite thian' tih hiala vuah an nih thu a sawi a. A bikin Mizorama ruihhlo tawlh man leh dan lova sumdawna ven kawnga 23 Sector Assam Rifles-te hmalakna fakawm a tih thu a sawi a. Tunhnaiah ralthuam thahnem tak bakah helte thlenga man an ni leh khawtlang mipui rawngbawl sak kawnga Assam Rifles-te hmalakna chhuanawm a tih thu a sawi bawk.

Governor chuan hetiang dawng thei tura an tawiamna ropui a tih thu a sawi a. Governor's Gold leh Silver Medal-te hi chawimawi phute chauh hlan thin an ni a ti a. Chawimawina dawngtute chu rinawm taka thawk chhunzawm zel tur leh an hlawhtlinna chu ram rawngbawl kawnga phurna petu atana hmang turin a fuih nghal bawk a ni.



VC ASSOCIATION

All Mizoram Village Council Association (AMVCA) in Village Council term pawh tawi chungchanga High Court-a sorkar an khinna chu kumthara High Court hawn a nih veleh ngaihtuah a ni dawn.

AMVCA President Pu K. Lalngaizuala'n Akashvani Correspondent a hrilh danin Gauhati High Court, Aizawl Bench-a tun thla ni 6-a sorkar khinna tur an thehluk chu sorkar atanga VC term pawhtawina order hmasa zawk, thla hmasa ni 20-a tihchhuah khinna tur a ni a. Sorkarin order dang, a tuk, thla hmasa ni 21-a a tihchhuahin order hmasa a luaflan avangin khin theih a ni lo a, order hmasa khinna tur chu nimin khan hnukdawkin order hnukung zawk khinna tur chu nimin vek khan thehluk a ni a ti a. Rang taka ngaihtuah an dil nachungin court chuan kumthara High Court hawn hun, January ni 13 emaw ni 14-ah emaw ngaihtuah tura a tih tluk tak thu Akashvani a hrilh a ni.

AMVCA President chuan tha thlah loin High Court-a case an kalpui chu inlungual takin a tawp thleng beih tumin hma an lak chhunzawm zel tih a sawi a ni.

Village Council term kal lai tih tawi a nih thu hi Local Administration department chuan thuchhuah siamin tun thla ni 21 khan nakum February ni 19-ah a tawp dawn thu an lo puang tawh a. Sorkarin financial year thar lo awm tura inthlan hautak tak tak pali awm tur tih zangkhaina tur leh sum renchem a duh avangin Village Council term kallai chu thla 6 in a pawt tawi tih LAD Minister Pu C. Lalsawivunga chuan a lo sawi tawh bawk a ni.

<><><>

AIZAWL BAZAR

Mizote hunpui ber Krismas chu kar khat vel lekin a dang tawh a, Aizawl khawpuia chak la thahnem tak pungkawmin, khawpui pawh a tawt chho hle hle tawh a ni.

Trade & Commerce department hnuai New Market enkawltu Marketing Inspector Pu Vanlalsawma chuan kumdang aiin mipui an pungkawm chakloa an hriat laiin tunkar Nilaini atangin mipui an tam tan hle tih Akashvani corr a hrih a.

Aizawl bazara thawmhnaw zuar Pu Lalnuntluanga chuan nikum aiin kuminah mipui an tam har hreta an hriat thu a sawi ve bawk a. Bawngkawn atanga Aizawl bazar lun lai Dawrpui huamchhung thlenga a sumdawngpui hrang hrang a zawhin sum a vang nia an hriat thu a sawi a, inhralh pawh a har deuha an hriat thu a sawi a ni. Hetihlai hian Mizoram sorkarin No Vehicle Zone a siam chu mipuite leh sumdawngte tan thil tha tak ni a a hriat thu Akashvani a hrih bawk.

Aizawl khawpui chhunga veng hrang hrang pawh an chei chho mek a, bazar huamchhungah dawr hrang hrang leh kawthler te chei a ni. Mizoram sorkar chuan kumdang ang bawkin kuminah hian mipuite him taka Krismas leh kumthar vuakveta an bazar theih nan December ni 23, 24 leh ni 31 chawhma dar 10 leh chawhnu dar 4 inkar chu ‘No Vehicle Zone’ kalpui leh tur a rel a ni.

<><><>

CM

Chief Minister Pu Lalduhoman hunpui lo thleng tur huphurh hluah hluah chhungkua tam tak an awm thin a; chung mi te thleng phaka sawrkar leh tlawmngai pawlte an kun hniam a tul a ti.

Vawiina Serchhip DC Office buatsaih Krismas leh Kumthar luanchhuah programme a hmanpuinaah he thu hi sawiin Chief Minister chuan nun danin a zir loh vang te, hrisel loh leh vanduaina avanga rahbi tleu, hunpui lo thleng tur huphurh hluah hluah chhungkua tam tak an awm thin a ni a ti a, khawtlang hruaitu, kohhran leh tlawmngai pawlte hnenah mi rethei tanpui tura chona siamin mahni veng leh khuaah ngaihsakna dawng ngailo an awm a nih chuan Lal Isua zirtirna an bawhchhia a ni, a ti.

Serchhip Town area a Village Council 14 atangin mi 5 theuh, belhkhawmin 70 in Krismas thilpek hi an dawng a. Thenzawl atangin mi 30, Neihloh khaw mi 10 leh Buangpui khua mi 11 ten thilpek hi an dawng a. Zoar Urban Deprived Children’s Home leh Unity Orphanage Home te hnenah sumfai hlan a ni bawk.

<><><>

REALLOCATION FUND

Environment, Forest & Climate Change Minister Pu Lalthansangan a pisaah Thorang Wildlife Sanctuary chhunga Dampui ‘S’ khua atanga sawnchhuah chhungkaw 6-te hnen ah ‘1st Installment of Reallocation Fund’ cheng nuai 8 theuh a hlan.

He hun a tarlan danin Thorang tlang chu Wildlife Sanctuary-a pawm a nih tak avangin Dampui 'S' khua ah 'National Rehabilitation and Resettlement Policy 2007' hnuai a Option –I Reallocation Plan kalpui a ni a. Wildlife Sanctuary tha leh changtlung, ram ngaw leh nungchate tha zawk a humhim hna kalpui a nih theih nan he khua a chhungkaw chengte insawnehhuahna turin zangnadawmna cheng nuai 10 zel ruahman a ni.

Kum 2011 khan Dampui 'S' atang a insuanchhuahna tur, Reallocation Plan kalpui tur a ruahmanna siam a nih khan chhungkua 61 awm anga chhinchhiahte atanga chhungkaw 44-te hnenah Reallocation Fund 1st Installment hi pek chhuah a ni a. Kum 2014 khan chhungkaw 47 chuan 2nd Installment leh Final Installment hi an dawng a, hemi kum tho hian chhungkaw 6-te chuan 1st leh 2nd Installment hi an dawn bak ah kum 2015 khan chhungkaw 2 chuan dawng lehin Reallocation Fund chu chhungkaw 55 hnen ah semchhuah a ni ta a ni.

Chhungkaw 6, hetih hunlai a insawnehhuak ve ta lote chuan insawnehhuah rem an tih tak avangin Deputy Conservator of Forest (WL), Aizawl, Thorangtlung Wildlife Sanctuary in-charge ni bawk chuan a tul hma la chhunzawmin inremna a siampui ta a ni.

<><><>

AKASHVANI CHARITY

Akashvani Aizawl Staff Welfare Association chuan vawiin khan Cancer Hospital Zemabawk-a damlo mi panga tan cheng sing 2 sang 6 theuh an hlan.

Vawiina damlo tanpuina atana pawisa an sen ral hi a vaiin cheng nuai 1 sing 3 a ni a, cancer vei harsa zual mi panga (5) Damdawiin lamin anlo thlan chu sing 2 sang 6 theuhin an pe a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Natuk zing dar 7 leh a chanve ah Chanchinthar hi puan leh a ni ang.

<><><>

PM MODI LAUNCHES DEVELOPMENT PROJECTS WORTH AROUND RS 6670 CRORES IN PRAYAGRAJ

Vawiin khan Prime Minister Narendra Modi-a chuan cheng Vbch 6670 senga hmasawna hnathawh Prayagraj-ah a hawng.

He hmunah hian Prime Minister chuan Mahakumbh 2025 chu a hawng bawk a. Hei hi kum thar January ni 13 atanga February ni 26 thleng hman tur a ni.

Vawiina Prime Minister-in hmasawna hnathawh a hawn zingah hian rel kawng leh lamlian project-te a tel a. Hengte hi hmasawna ruhrel tichaktu tur leh Prayagraj kalpawh ti-awlsamtu tur a ni.

Prime Minister hian Temple kawtchhuah lian tak tak a hawng bawk a, chu'ng zingah chuan Bharadwaj Ashram Corridor, Shringverpur Dham Corridor, Akshayvat Corridor, Hanuman Mandir Corridor-te pawh a tel a. Prime Minister chuan a

sawrkar chu hnam ziarang leh nunphung bakah rochun thilte tihausa zel turin hma lam panin a kal zel a ni a ti.



LOK SABHA BEGINS 2-DAY SPECIAL DISCUSSION ON 75 YEARS OF CONSTITUTION OF INDIA

Vawiin khan Lok Sabha-ah ni 2 awh tur India danpuiin kum 75 a tlin chungchang sawiho tan a ni.

He sawihonaah hian Defence Minister Rajnath Singh-a chuan India danpui chuan ram leh hnam dinna atan – vantlang nun, ei leh bar, politics leh hnam ziarang zawng zawngte nen kawng a hawnsak a ni a ti a. Danpui chu a rama mi chengte khawsakzia ti-hluta a ni a ti. Rajnath Singh-a chuan kum 75 kalta ata tawh khan Danpui duangtute chuan tun dinhmuna India tan hian danpui an lo peih diam tawh a. Kum 3 lai chai a nih hnu-ah India chuan Danpui a nei chho ta a ni a ti baw. A duangtu Constituent Assembly-in Danpui an lo duan chu lehkha pawimawh a ni satliah lova; mipuite duh dan phochhuahna a ni a ti baw.

He hunah hian Congress MP Priyanka Gandhi Vadra chuan Danpui chu khua leh tuite himna tura phaw a ni a, dik taka ro relna tur, in unauna leh duh zawng sawichhuah theihna tur dan a ni a ti a. Chu himna phaw chu rorel lai sawrkar hian tihchhiat a tum a ni a ti baw.

